



Kementerian Pembangunan
Wanita, Keluarga dan Masyarakat



LEMBAGA PENDUDUK DAN PEMBANGUNAN KELUARGA NEGARA
(Kementerian Pembangunan Wanita, Keluarga dan Masyarakat)

Bangunan LPPKN, 12B, Jalan Raja Laut, Peti Surat 10416,
50712 Kuala Lumpur.

Telefon : 603 2693 7555

Faks : 603 2693 7250

Emel : penduduk@lppkn.gov.my

Laman Web : www.lppkn.gov.my



Dasar Keluarga Negara



Mukadimah

Keluarga adalah sebuah unit asas sosial yang membekalkan sumber manusia untuk pembangunan serta menjamin kesinambungan insan sebagai generasi akan datang. Mengikut peruntukan dalam Deklarasi Hak Asasi Manusia Sejagat (1948), institusi keluarga adalah satu unit terpenting dalam masyarakat. Sehubungan itu, adalah wajar institusi keluarga diberi perlindungan oleh masyarakat dan Kerajaan. Justeru, institusi keluarga perlu **diperkukuh**, **diperkaya** dan **diperkasakan** dengan ilmu, pengetahuan dan kemahiran yang terkini.

Dasar Keluarga Negara ini yang menyokong dan melengkapi dasar-dasar yang sedia ada seperti Dasar Sosial Negara, Dasar Wanita Negara dan Dasar Kanak-kanak Negara turut berteraskan kepada Perlembagaan Persekutuan, Rukun Negara dan matlamat Wawasan 2020. Di samping itu, dasar ini turut merujuk secara khusus kepada tanggungjawab antarabangsa Malaysia seperti di bawah *Convention on the Elimination of All Forms of discrimination Against Women (CEDAW)* dan *Convention on the Rights of the Child (CRC)*.

DKN turut dilengkapi dengan Pelan Tindakan Keluarga Negara (PTDKN) bagi memperincikan tindakan yang perlu diambil oleh kementerian, jabatan dan agensi kerajaan, NGO, ahli akademik, sektor swasta dan anggota masyarakat. Sehubungan itu, DKN diterjemahkan dalam bentuk program dan aktiviti untuk memudahkan pihak yang berkepentingan melaksanakannya dengan berkesan. PTDKN mengandungi 3 Teras Strategik yang meliputi sektor-sektor utama negara serta melibatkan 40 agensi pelaksana.

RasionalDKN

Penggubalan DKN dan PTDKN membolehkan langkah-langkah yang lebih menyeluruh dan sistematik dapat ditumpukan kepada:

- i. **Arah tuju kesejahteraan keluarga yang *total*** dan menyeluruh, merangkumi pembangunan fizikal, mental, ekonomi, sosial, psikologi dan kerohanian bagi setiap peringkat dalam kitaran hidup keluarga.
- ii. Keluarga sebagai unit yang paling asas, **menyediakan landasan untuk pembangunan modal insan** bagi menggerak pembangunan sesebuah negara. Justeru dasar, program, perkhidmatan, perlindungan dan infrastruktur sokongan untuk mendayaupayakan keluarga melalui kekuatan yang sedia ada (*inherent strengths*) dalam diri mereka perlu dibangun dan disebarluaskan bagi melahirkan modal insan yang bermaruah, berkualiti tinggi dan berperibadi mulia.
- iii. **Pembentukan dan pengukuhan institusi keluarga** di mana setiap ahli keluarga dapat diperkasa untuk melaksanakan peranan dan tanggungjawab bersama dan saksama dalam aspek kekeluargaan, ekonomi, kerjaya dan kehidupan demi meningkatkan kestabilan, keharmonian dan kesejahteraan hidup.
- iv. Usaha membimbing dan memupuk kemahiran untuk **keluarga menyemai, menghayati, dan mengamal nilai murni dan nilai kekeluargaan**. Nilai-nilai murni boleh dijadikan pemangkin untuk mencapai kejayaan dan benteng pertahanan diri ahli keluarga. Amalan nilai murni bagi setiap insan dalam keluarga perlu disebar luas dan diperkukuhkan (*reinforce*) dalam institusi pendidikan, komuniti dan di tempat kerja.

- v. Usaha **mengeratkan perhubungan antara generasi** di mana warga emas dapat memelihara (*preserve*) dan memperturunkan warisan, nilai murni dan ciri-ciri akhlak mulia kepada generasi akan datang. Maka budaya keluarga penyayang yang akrab, prihatin, hormat-menghormati, adil dan saksama, saling bantu-membantu, dan melindungi warga yang lemah, lanjut usia dan daif boleh diwujudkan, diperkukuhkan dan disebarluaskan.
- vi. **Hak asasi kemanusiaan dan kesaksamaan di mana penumpuan akan diberi kepada undang-undang dan dasar yang menjamin perlindungan dan keselamatan serta membudayakan kesaksamaan gender dalam keluarga.** Kesedaran dan ilmu pengetahuan akan dipertingkatkan kepada ahli keluarga untuk menghormati hak keluarga, hak individu dalam keluarga supaya dihormati sebagai insan yang memiliki darjat dan maruah diri (*self-dignity*). Amalan positif digalakkan untuk membudayakan keharmonian, keadilan dan kesaksamaan gender dalam kehidupan keluarga tanpa mengira perbezaan jantina dan umur. Jaminan perlu diberi untuk mendapat maklumat dan hak perlindungan undang-undang, penyertaan sosial, perkongsian sumber secara saksama dalam keluarga dan perlindungan daripada keganasan, penderaan serta pengabaian dalam keluarga terhadap wanita, kanak-kanak dan warga emas.



- vii. **Peningkatan komitmen dan tanggungjawab sosial** semua pihak untuk melaksanakan dasar dan program mesra keluarga. Usaha perlu diperhebatkan untuk mengarusperdanakan implikasi kesejahteraan keluarga dalam perancangan, pelaksanaan, pemantauan dan penilaian program pembangunan ekonomi, politik, kesihatan, sosial, kerohanian, persekitaran, sains dan teknologi serta perundangan. Melalui dasar ini, komitmen boleh dipertingkatkan untuk menyemak dan menyusun semula dasar, objektif, strategi dan program pembangunan dan pemantauan supaya lebih mesra keluarga.
- viii. Peningkatan **pelaksanaan program kesejahteraan keluarga** untuk keluarga yang berbeza struktur dan mudah terancam. Komitmen dan tanggungjawab sosial semua pihak akan dipertingkatkan selaras dengan budaya penyayang masyarakat Malaysia. Program pelbagai pihak akan disusun, diselaraskan dan diperluaskan dengan perkhidmatan, kemudahan dan infrastruktur sokongan





untuk keluarga yang berbeza struktur seperti keluarga yang diketuai oleh ibu tunggal atau bapa tunggal, keluarga miskin tegar, keluarga mudah terancam (terabai atau daif), keluarga yang mempunyai anak istimewa, keluarga yang dianggotai oleh orang kurang upaya dan sebagainya.

- ix. **Pembangunan modal insan dan K-Keluarga:**
Komitmen dan tanggungjawab sosial semua pihak akan dipertingkat dan diperluaskan untuk menyediakan perkhidmatan dan kemudahan dari aspek teknologi maklumat dan komunikasi (ICT) serta menyediakan sokongan mesra keluarga dan peluang bagi ahli keluarga memaju dan memahirkan diri.

Pernyataan Dasar & Matlamat DKN

PERNYATAAN DASAR

Satu dasar untuk mengutamakan perspektif keluarga dalam segala usaha pembangunan sosio-ekonomi bagi melahirkan generasi berkualiti.

MATLAMAT

Dasar ini bermatlamat untuk membangunkan keluarga yang sejahtera, sihat dan resilien untuk memastikan kestabilan sosial. Dasar ini juga menjadi pemangkin kepada kesedaran dan komitmen semua pihak yang berkepentingan, termasuk setiap anggota masyarakat untuk mencapai matlamat yang dihasratkan.

PrinsipDKN

Prinsip 1

Keluarga memiliki kekuatan tersendiri (*inherent strengths*), bertanggungjawab untuk kelangsungan generasi ke generasi.

Prinsip 2

Keluarga bertanggungjawab memupuk dan menghayati nilai-nilai murni.

Prinsip 3

Kepelbagaian struktur keluarga mewujudkan keperluan yang berbeza.

Prinsip 4

Hubungan mesra, budaya perkongsian sumber dan tanggungjawab bersama dan saksama menjamin kesejahteraan keluarga.

Prinsip 5

Ilmu dan maklumat sebagai asas keluarga sejahtera (K-Keluarga).

Prinsip 6

Perundangan, dasar dan program perlu mesra keluarga.

Prinsip 7

Ahli keluarga mempunyai hak asasi dan perlindungan bagi menjamin maruah diri.

Prinsip 8

Komitmen majikan menjamin kesejahteraan keluarga.

Teras Strategi Pelan Tindakan DKN

- i. Meningkatkan komitmen dan penglibatan pelbagai pihak untuk mengutamakan perspektif keluarga dalam segala usaha pembangunan sosio-ekonomi;
- ii. Memastikan undang-undang, dasar, prosedur serta penguatkuasaan undang-undang dan peraturan mengutamakan perspektif keluarga; dan
- iii. Menyedia dan memastikan program, perkhidmatan dan kemudahan mesra keluarga mudah diakses atau dicapai.



Strategi Pelaksanaan DKN

Bagi mencapai matlamat Dasar Keluarga Negara, sebanyak enam (6) strategi telah dirangka. Menerusi strategi ini, hasrat Kerajaan untuk mengukuhkan institusi keluarga dapat direalisasikan. Strategi-strategi tersebut adalah seperti berikut:

- i. **Penyelidikan dan Pembangunan dalam Kesejahteraan Keluarga**
Menggalakkan penyelidikan dan pembangunan dalam bidang kesejahteraan keluarga, di mana hasilnya dapat digunakan sebagai input kepada penggubalan dasar dan undang-undang serta perancangan program.
- ii. **Advokasi Mengutamakan Kesejahteraan Keluarga**
Promosi, keprihatinan dan iltizam untuk mengutamakan kesejahteraan keluarga dalam dasar dan program pembangunan bagi para pemimpin, penggubal dasar, pembuat keputusan dalam sektor awam, swasta, pemimpin masyarakat sivil dan keluarga sendiri dapat dipertingkatkan melalui advokasi.
- iii. **Latihan dan Pendidikan Sepanjang Hayat untuk Pembangunan Modal Insan dan Keluarga Sejahtera**
Menyediakan peluang dan prasarana untuk keluarga menyertai program latihan dan pendidikan sepanjang hayat secara formal dan tidak formal untuk menggalakkan keluarga memiliki ilmu dan kemahiran yang relevan bagi membangunkan insan yang mempunyai nilai-nilai murni dan berakhlak mulia.



iv. **Penyediaan Kemudahan Sumber dan Persekitaran yang Mendayaupayakan Keluarga**

Melalui strategi ini, usaha untuk meningkatkan akses pelbagai sumber melalui perkongsian, pertukaran, pengumpulan dan peningkatan pelbagai sumber untuk mengendalikan program, perkhidmatan dan sistem sokongan serta kemudahan mesra keluarga dapat dilaksanakan.

v. **Perundingan dan Perkongsian Pintar dalam Pelbagai Agensi Kerajaan, Swasta, Pertubuhan Bukan Kerajaan, Institusi Pengajian Tinggi dan Komuniti**

Kerjasama yang strategik dan bersepadu antara semua pihak yang terlibat dalam pelaksanaan DKN melalui perkongsian maklumat, pakar rujuk, sumber teknikal dan kejurulatihan.

vi. **Pemantauan dan Penilaian**

Melalui strategi ini, maklum balas dan keberkesanan program hasil daripada proses pemantauan dan penilaian pelaksanaan Pelan Tindakan Keluarga Negara dapat dikumpul dan digunakan sebagai input baru untuk merangka/ meminda dasar dan perundangan serta menambah baik program susulan.



Penutup

Dasar Keluarga Negara merupakan dasar utama yang memfokuskan kepada aspek kesejahteraan dan pembangunan keluarga. Dasar ini juga memberi hala tuju kepada program dan perkhidmatan yang mesra keluarga bagi membangunkan keluarga yang sejahtera supaya anggota masyarakat menghayati nilai-nilai murni sejajar dengan aspirasi Wawasan 2020. Pelaksanaan DKN perlu diberi penekanan oleh pelbagai pihak yang berkepentingan demi pembangunan modal insan yang berperibadi mulia dan keluarga yang sejahtera.

